


Puerto Limon di Costa Rica y nos Distrito San Nicolas tin similitud hasta den historia



ORANJESTAD (AAN) – Den entrevista cu Decano di e Facultad di Arte y Ciencia di Universidad di Aruba mr. Luciano Milliard, y e Investigador na Instituto Pedagógico Arubano (IPA) y docente na U.A, sr. Gregory Richardson, nan a amplia tocante nan participacion den e 17th Conferencia Anual di e West Islanan Caribeense, na Puerto Limon, Provincia di Costa Rica.

Decano mr. Milliard a un parti di e conferencia tabata riba un anochi unda e comunidad di Puerto Limon a wordo invita pa bin topa cu e bishitantenan di e diferente islanan di Caribe, cu a participa.

Den e encuentro aki cada participante a elabora y discuti riba un topico di interes di nan respectivo pais. Nan tabata tin algun minuut pa haci esaki cu e comunidad Limonense.

Den e caso aki mr. Milliard y sr. Richardson a papia tocante diferente aspecto di e distrito di San Nicolas.

Sr. Richardson a elabora tocante Idioma y mr. Milliard

a enfoca riba e diversidad religioso.

“Nos a constata cu tin un similaridad enorme entre San Nicolas y Puerto Limon. Un historia similar, ambos pueblo ta papia Ingles Caribeense, tur dos ta ciudadnan cu waf, y tambe nan tin Calypso den nan cultura”, mr. Milliard a comenta.

“Nos a haci un comparacion entre e Calypsonian di Aruba cu ta Mighty Talent y esun di Limon Walter Ferguson. Y e aspecto multilingual tambe a resalta na Limon unda nan ta papia Spaño y Ingles Crioyo Limonense”, sr. Richardson a bisa acerca.

Señor mr. Luciano Milliard a keda sorprende y a haya hopi interesante tambe como na San Nicolas como na Puerto Limon, tin hopi similitud den e parti religioso. Aya tambe tin Iglesia Metodista y Adventista y nan ta haci uso di Ingles como lenga di Culto.

Den e gimnasio di e Universidad tabata tin un programa cultural y por a mira e diferente culturanan

tanto Limonense- Caribeense como di e Valle Central y e cultura Indígena.

Sr. Richardson a subraya cu den e sala grandi nan por a apreciar un mezcla di diferente etnia den e programa cultural aki.

Esaki tabata e prome bishita di sr. Gregory Richardson a Costa Rica, mientras cu pa mr. Milliard tabata e di cuater, pero esun prome na Puerto Limon.

“Puerto Limon tin hopi movecion, bo ta mira hopi container ta dreña y sali, hopi taxi ta circula, y ta duna impresion cu tin hopi placa ta dreña, sinembargo e infraestructura di camindanan ta basta descuida, como si fuera tin hopi tempo sin inverti den mantenimiento. Pero en general ta un ciudad hopi interesante”, e docente Gregory Richardson a señala. El a agrega cu el a haya oportunidad tambe di bay na Universidad di Costa Rica na San Pedro de Montes de Oca, cu ta e sede central, y el a bishita e Facultad di Educacion.

“IPA tin un programa yama ‘Perspectiva mundial’ riba e tema di sostenibilidad en general pero tambe den Enseñanza, y den esaki e aña aki un grupo lo bay Costa Rica”, el a duna di conoce.

Finalmente, nan a menciona cu e Conferencia ta wordo organiza tur aña pa Universidad di Puerto Rico Rio Piedras, University of Virgen Islands, West Indies University of Barbados, hunto cu un instituto di cada Isla Caribeense. Pa aña 2015 e sede lo ta St.Kids.